

乾隆杭州府志

杭州府志卷八十六

人物 四 循吏一

漢

諸葛琮餘杭人後漢時爲河間太守以賢德稱卒葬禪山

舊志

按琮正史無考咸淳志載其名于古今人表成化志據以錄入今從之禪山咸淳志作斷山

何敞錢塘人漢末隱居五湖時大旱蝗太守奉印綬請爲無錫令敞慨然歎曰民苦旱災如此安得不救往修六事行弭災之術三日雨蝗盡死敞乃遁去

江南通志

按萬歷常州府志名宦傳作陶穀而江南通志作何敞  
所載悉同敞隱者也而救旱驅蝗則有功于民故列循

吏門

南北朝

范述曾字子元錢塘人幼好學齊文惠太子幼時高帝引  
述曾爲之師友明帝卽位出爲永嘉太守爲政清平不尚  
威猛民俗便之所部橫陽縣山谷險峻爲逋逃所聚前後  
二千石討捕莫能息述曾下車開示恩信凡諸凶黨襁負  
而出編戶屬籍者二百餘家自是商賈流通居民安業在  
郡勵志清白不受饋帝聞甚嘉之徵爲游擊將軍郡送故

舊錢二十餘萬述曾一無所受始之郡不將家屬及還吏  
無荷擔者民無老少皆出拜辭號哭聞于數十里東昏時  
還鄉里高祖踐阼詔曰中散大夫范述曾昔在齊世忠直  
奉主往蒞永嘉治身廉約宜加禮秩以厲清操可大中大  
夫賜絹二十四匹

梁書  
本傳

宋

謝濤其先陽夏人父懿文爲鹽官令葬富陽遂爲富陽人  
濤以進士起家爲梓州權鹽院判官李順反成都濤守禦  
之賊平以功遷觀察推官知華陽縣亂亡之後田廬荒廢  
詔有能占田而倍入租者與之于是腴田悉爲豪右所占

流民至無所歸濤收詔書悉以田還主知興國軍以治行  
召對命試學士院會契丹入寇真宗議親征以濤知曹州  
屬縣賦稅多輸睢陽助兵食是歲霖潦百姓苦于轉送濤  
悉留不遣奏曰江淮漕運日過睢陽可取以餉軍願留曹  
賦繇廣濟河以饋京師轉運使論以爲不可詔從濤奏嘗  
使蜀還舉所部官三十餘人宰相疑以爲多濤曰有罪願  
連坐奉使舉官連坐自濤始以尚書兵部員外郎直史館  
兼侍御史知雜事真宗山陵靈駕所經道路有司請悉壞  
城門廬舍以過車輿象物濤言先帝車駕封祀儀物大備  
猶不聞有所毀撤且遺詔從儉今有司治明器侈大以勞

州縣非先帝意願下少府裁損之進直昭文館累官至太

子賓客

宋史謝絳傳

唐肅字叔元錢塘人舉進士調鄆縣主簿徙泰州司理叅軍有商人寓逆旅而同宿者殺人亡去商夜聞人聲往視之血沾衣爲捕吏所執州趣獄具肅探知其寃持之後數日果得殺人者後爲龍圖閣待制登聞檢院知審刑院

宋史

本傳

盛京餘杭人登咸平戊戌進士康定初爲諫議大夫出守江寧以老乞便郡詔移海州天資仁厚不忍以法繩下吏民化服無有欺者以事去久而民益思之仕終工部侍郎

後十年子遵甫以光祿寺丞通判海州歲旱發公私藏粟以廩民全活甚衆設方畧捕盜輒得又四十餘年遵甫子仲孫以朝奉大夫守海州期年大治郡人有盛使君家兒世世循吏之稱

萬歷舊志

元奉宗字知禮餘杭人景德中甲科初命歙州知績溪縣事再命常州武進令皆以廉愛稱遷知通州海門縣入拜尚書屯田員外郎告歸卒在海門日邑有大瀆亘數十里堙而不治奉宗抗議藉力導至于海人咸利焉

范仲淹元奉宗墓誌

奉宗初姓危臨川人曾祖避兵來杭州易姓元祖德昭仕吳越至丞相遂爲錢塘人

成化舊志

按元奉宗墓誌作餘杭人成化志作錢塘人宋史奉宗  
無傳其弟絳傳作錢塘人今兩存之以備參考

郎簡字叔廉臨安人幼孤貧從學四明朱頔及長學文於  
沈天錫登景德二年進士大中祥符間授寧國縣徙福清  
邑有石塘陂歲久漸湮塞簡募民浚築漸廢田百餘頃邑  
人爲立祠調隨州推官及引對真宗曰簡歷官無過而無  
一人薦是必恬于進者特除祕書省著作佐郎知分宜改  
寶州有縣吏死子幼贅壻僞爲券冒其貲子長屢訴不得  
直訟于朝下簡劾治簡示以舊牘曰此爾翁書耶曰然又  
取僞券示之勿類也始伏罪徙藤州興學養士俗爲一變



藤始有舉進士者知廣州捕斬賊馮佐臣以工部侍郎致

仕卒贈吏部侍郎

宋史本傳

褚從禮字德嘉以賢良方正舉歷官至太原守居心平恕刑惟求生有捕役獲盜十餘人皆諭之以義羣盜願求改過卒爲良民性甘淡薄一介不妄取日課家僮于公署種

蔬自給世稱廉吏

錢塘縣志

錢暄字載陽惟演子任郎官知開撫台三州有治績除少府監又知鄧州爲三司鹽鐵副使時勾考諸路逋租兩浙轉運使當坐負暄因對爲言逋租不入以頻年饑故今使者被罪必亟歛恐民不堪惟稍寬乃可集得免出知鄆州

除寶文閣待制卒

成化舊志

沈周字望之錢塘人登大中祥符乙卯進士歷大理丞除

知簡州平泉縣人安其政尋通判蘇州以廉靜稱

蘇州府志

康

定中自潤州移刺泉州爲治簡易不尚苛刻民有訟者使

退而思過皆自解去先是泉多盜前守令民早休市閉門

周至除其令以便民盜亦自息累官江東按察使皇祐三

年卒

泉州志

元絳字厚之其先臨川危氏祖德昭仕吳越遂爲錢塘人

舉進士調江寧推官攝上元令民有號王豹子者豪占人

田掠男女爲僕妾有欲告者則殺之以滅口絳捕置干法

甲與乙被酒相歐擊甲歸臥夜爲盜斷足妻稱乙告里長  
執乙詣縣而甲已死絳救其妻曰歸治而夫喪乙已伏矣  
陰使信謹吏跡其後望一僧迎笑切切私語絳命取僧繫  
廡下詰婦姦狀卽吐實人問其故絳曰吾見妻哭不哀且  
與傷者共席而襦無血汗是以知之安撫使范仲淹表其  
材知永新縣豪子龍聿誘少年周整飲博以技勝之計其  
貲折取上腴田立券久而整母始知之訟于縣縣索券爲  
證則母手印存弗受又訟于州皆不得直絳至母來訴絳  
視券呼謂聿曰券年月居印上是必得周母他贖尾印而  
換僞券續之耳聿駭謝卽日歸整田權江西轉運判官知

台州入爲度支判官儂智高叛嶺南宿軍邕州而歲漕不足絳以直集賢院爲廣東轉運使建潁江水砦數十以待逋寇繕治十五處樓堞械器皆備軍食有餘累知開封府拜三司使叅知政事數請老神宗命其子耆寧校書崇文院慰留之會太學訟連耆寧罷知亳州入辭帝曰朕知卿一歲卽召矣卿意欲陳訴乎絳謝罪願得潁卽以爲潁州明年加資政殿學士知青州又明年以太子少保致仕卒年七十六贈太子少師謚章簡

宋史本傳

沈播錢塘人天聖二年進士爲貴池縣主簿適令不能其官播佐之縣以大治嘗攝銅陵縣事有兄弟爭財者播爲

辨其曲直卒使感悟讓財同居及去兩縣人追送涕泣遠而後去

池州志  
名宦傳

錢彥遠字子高錢塘人易之子以父任爲太廟齋郎大理寺丞復舉寶元戊寅進士舉賢良方正直言敢諫慶歷中知潤州因災異上疏極言幽燕靈武及湖廣蠻獠劫掠殘殺以致愁苦之氣召爲水旱願精擇長吏以恤之因發常平倉賑救部使者責其專彥遠不爲屈召爲右司諫請罷數赦擇牧州守增俸入以養廉吏息土木以省工費遷起居舍人直集賢院知諫院其任言職數有建明卒于官年

三十七

舊浙江  
通志

謝景初自大理丞出知餘姚民所利病相緩急設方畧北  
偏瀕海爲築堤捍之豪強率侵湖爲田具奏禁止民又爭  
水泉乃立規繩簿記其高下廣狹啟閉晷刻令各鄉遵守  
名曰湖經有盜湖爭利者證經乃息瀕海多盜煮海乃頒  
示約束令民無失利法亦罔忤而鹽課倍昔又飭厲學官  
化誨子弟時景初知餘姚其弟師立知會稽王介甫知鄞  
韓玉汝知錢塘皆有聲吳越稱四賢云於越新編景初富陽人  
絳之子慶歷六年甲科及第以大理評事知餘姚縣遷益  
州路提點刑獄以屯田郎致仕博學能文尤長于詩堦黃  
廷堅自謂從謝公得句法兩浙名賢錄

沈遵字文通錢塘人以蔭爲郊社齋郎舉進士廷唱第一  
大臣謂已官者不得先多士乃以遵爲第二通判江寧府  
歸奏本治論仁宗曰近獻文者率以詩賦豈若此十篇爲  
可用也除集賢校理以父扶坐事免求知越州徙杭州爲  
人疎簡博達明于吏治民或貧不能葬給以公錢嫁孤女  
數百人倡優養良家子者奪歸其父母善遇僚案皆傾心  
爲之耳目刺間巷長短纖悉必知事來立斷召知開封府  
遷龍圖閣直學士早作視事逮午而畢沛然有餘暇士大  
夫稱其能拜翰林學士丁母憂歸蘇州旣葬廬墓下服未

竟而卒

宋史  
本傳

陸誥字介夫餘杭人景祐元年進士召試學士院爲集賢  
校理陝西鑄法壞以誥爲提點刑獄誥上鼓鑄便宜詔悉  
行之歷湖南北轉運使進集賢殿修撰知桂州自儋犛定後  
交人浸驕誥至部集左右江四十五峒首詣麾下閱簡工  
丁五萬補置將吏軍聲益張交人遣使入貢詞禮加恭召  
爲天章閣待制知諫院命張田代之英宗戒以毋得改誥  
法除知延州趣入覲帝勞之曰卿在嶺外設施無不當者  
累官龍圖閣待制知成都府青苗法出誥言蜀岷刀耕火  
種民食常不足至種芋充饑脫歲儉不能償官適陷之死  
地願罷四路使者詔獨置成都府一路熙寧三年卒

宋史  
新編



韋驥字子駿錢塘人皇祐癸巳進士以薦擢利州路運判  
移福建路年饑議請賑貸驥曰聞去京師往反數千里今  
民朝不及夕上書待報是冠冕從容以救焚溺也乃檄州  
縣發廩而請違法之罪于朝閩盜阻險爲數州患驥設方  
畧捕獲誅之部內肅然召爲主客郎中出知明州乞祠成化  
舊志

唐垌以父任得官爲崇文校書薦爲御史除太子中允凡  
奏二十疏論時事皆留中乃因百官起居日叩陛請對宣  
讀六十條大畧以安石專作威福曾布等表裏擅權上屢  
止之垌慷慨自若安石爲之請去閤門糾其瀆亂朝儀貶

潮州別駕鄧綰申救之改監廣州軍資庫宋史本傳 垌詢子坐

事貶潮州司馬有惠政及民潮州府志

林大年錢塘人和靖裔孫哲宗朝爲御史知蘄州介潔自

喜有美政人思之湖廣通志

錢勰字穆父彥遠子以蔭知尉氏縣授流內銓主簿神宗

召對將任以清要官王安石使弟來見許用爲御史勰謝

曰家貧母老不能爲萬里行安石知不附已命權鹽鐵判

官奉使高麗凡餽餼皆弗納王遣吏追餉金銀器四千兩

竟却之元祐初遷給事中知開封府老吏畏其敏欲困以

事導人訐牒至七百勰隨即剖決簡不中理者緘而識之

戒無復來閱月聽訟一人又至呼詰之曰吾固戒汝矣安得欺我其人調言無有總曰汝前訴云云吾識以某字啟緘示之信然上下皆驚咤宗室貴戚爲之歛手雖丞相府吏千謁請亦械治之積爲衆所憾出知越州召拜戶部侍郎進尚書加龍圖閣直學士復知開封臨事益精哲宗涖政翰林缺學士章惇三薦林希帝以命總惇因是極意排詆諷全臺攻之罷知池州卒于官

宋史記

錢繇杭州人熙寧間以光祿寺丞出知龍泉縣朝廷初更新法編次保伍人情駭異繇諭以德意民始安輯爲政務簡易必便于民及去老幼思之立去思堂丞相吳充作記

處州府志

錢卽字中道吳越王諸孫也第進士崇寧中爲陝西轉運判官王師復銀州轉餉最徽宗召對問曰靈武可取乎對曰願敕邊臣先爲不可勝以待曩庶可得志帝然之除直龍圖閣知慶州至鎮築安邊城歸德堡包地萬頃縱耕其中歲得粟數十萬徙知延安府重貫宜撫陝西計司承望風旨取市價率減什四民至罷市又行均糴法關內騷然卽抗章極陳其害貶永州團練副使睦寇作起知宣州進龍圖閣學士轉正奉大夫致仕卒贈光祿大夫諡忠定

宋史

錢惟演傳

按沈播及錢卽咸淳志進士表省志選舉門俱失載

沈振字發之錢塘人累遷星子令有能名公卿使者交薦

改大理丞監蘇州稅遷太子中舍司農少卿卒

洪武蘇州府志

史徽杭州人政和間知青田縣明敏果斷俗以茅茨葺屋

多火災徽教以用陶瓦其患遂寢號爲史青田

處州府志

沈杞餘杭人紹興初知廉州時貢舉附雷州杞憫士遠涉

鯨波請于本州置選場詔從之自是士益振奮得人爲盛

後立祠于學宮祀焉

廣東通志

樊光遠字茂實錢塘人紹興五年南省奏名第一除秘書

省正字上疏言事與秦檜忤罷爲閬州教授後召爲秘書

丞俄引對言頃年大臣挾權修怨不平其心臺諫之所排  
擊法寺之所鍛鍊告訐之所中傷其間并有因責降而死  
者子孫無一命之祿宜許令自陳與復官職錄其子孫上  
曰善除監察御史累遷福建路提點刑獄知嚴州時三衙  
誘掠近郡平民爲軍光遠奏乞禁止又言本州歲輸御爐  
炭七萬四千五百斤而不償民間之直上亟爲罷之萬歷舊志  
萬鍾字元亨錢塘人淳熙十年知泰州購名書藏于州學  
修城東南北三水門建譙樓其上增祀胡瑗王居正于三  
賢祠鍾以儒雅飾吏治澹然不事功利而蠹弊盡除民甚

德之揚州府志

邵德一臨安人紹興丁丑進士知廉州既至見學宮毀于賊乃徙于城東門外捐俸以供公費不擾于民立祠祀之

廣東通志

按廣東通志作餘杭人今從浙江通志選舉門改正

莫元忠字子直仁和人乾道壬辰進士知義烏縣歲歉勸分粟賑之判德安撫惠貧民新學造士滿去人皆思之居鄉請設官田增學庠爲養士費又謂齒尚于鄉倫明于學歲時必造學宮習長幼之儀鄉黨尊異之

嘉靖府志

莫若晦字子明舉進士除守宜春蜀通舉陞後守嚴州有

虎患若晦示恩信于民虎遂去擢湖廣南庠提舉

湖廣通志

莫若冲字子謙淳熙乙未進士知安吉吳江有聲除司農  
簿出知岳州兵荒盜起督捕賑發境內帖然知全州漕司  
檄解軍糧州處湘源壤高易涸客舟不至若冲發官帑造  
舟搬運率先諸那明年靖江暴水民賴以濟除大理寺丞

丐祠歸

嘉靖府志

黃黼字元章餘杭人少游太學舉乾道己丑進士累遷太  
常博士除兩浙路轉運判官浙東瀕海之田以旱澇告常  
平儲蓄不足黼捐漕計貸之毘陵饑民取糠粃雜草根以  
充食郡縣不以聞黼取民食以進乞捐僧牒緡錢賑濟全

活甚衆

朱史稿



錢象祖錢塘人吳越王裔孫以蔭入官累遷吏部尚書同知樞密院事因諫用兵侂冑責其懷奸避事罷爲資政殿學士俄奪官貶知信州期年而政成大新學宮置明輝閣以延文士一時士習爲之丕變嘉定初拜左丞相兼太子少傅卒封魏國公諡忠靖

宏簡錄本傳

潘剛中字齊父臨安人嘉定辛未進士知臨安軍州事時郡隄多堰土水嚙輒潰行者病之剛中出緡錢磊石畚築易爲坦途又置抵當庫貯公費俾嗣築焉

江西通志

按省志選舉作富陽人

章鑄昌化人鑑之弟嘉定庚辰進士淳祐間以朝議大夫

將作監知信州舊有小學不能復興乃擇美地創之贍以官田師生有定員講習有定規州舊有浮橋歲久潰廢行者病涉乃節郡中浮費以新之名平政橋又收廣教寺租以成諸溪橋委郡博士作上饒志而自爲記云

江西通志

錢衡字守道錢塘人寧宗開禧初知建寧縣事神治民克盡其誠增修學校士風以振

建寧縣志

趙與清臨安人宋宗室開禧中知浮梁縣爲政簡易與民

安之尤以人才爲亟講學興禮士風翕然

江西通志

李延忠字居厚臨安人開禧中知旌德縣創制學田八十餘畝捐縣市諸鄉地稅錢九千餘緡膳學宮弟子建縣東

石橋及亭舍十餘楹行者便之

旌德縣志

顧冲錢塘人淳熙中知蕭山縣適歲旱湘湖水利不均民爭不已冲乃度地勢高下放泄後先勒定時刻約束甚嚴又禁侵湖爲田者并酌舊議少損八鄉以益許賢一鄉民始得其平其他善政多類此

紹興府志

薛興祖錢塘人嘉定末任宜興縣主簿邑小而產茶甚少官引難售頗爲民累興祖上書使者免之民感其德其誦有曰孰還其舊孰已其新抗論不回唯尉之仁漫塘劉宰作文記之

錢塘縣志補

水邱袤臨安人寶慶丙戌進士知嵊縣愷悌詳明溫恭律

已拓修學校邑人周炎爲之記

錢塘縣志補

韋能千字叔能錢塘人淳祐間爲玉山丞性廉介和平楊沂中有田產隸玉山常致餉于長吏甚腆能千不却受而附諸縣庫在官日與東星趙渙游從獨厚每過其廬清談竟日止對酌卮酒而去不及以私尤工于詩

廣信府志

麋弇字仲昭富陽人開慶中知建昌軍民詞數千立剖決皆洞見其情蠲未催苗三千餘石豪族有誣民爲盜者獄已具弇直之武斷之民遂戢

江西通志

元

孫德潤字以誠錢塘人由江浙行省掾吏爲處州松陽令

先是縣籍失實力役無稽民困于徭役德潤力行計畝均役之法以方田履其頃畝以土會等其磽沃以出賦定役籍既具適南北多事徵歛旁午縣惟按籍征之民大悅

兩浙

名賢錄

鄧文原字善之一字匪石縣州人父漳徙錢塘文原年十五通春秋至元二十七年行中書省辟爲杭州路儒學正皇慶元年召爲國子司業首建白更學校之政科舉制行文原校文江浙慮士守舊習大書朱子貢舉私議揭于門延祐五年出僉江南浙西道肅政廉訪司事平江僧有憾其府判官理熙者賄其徒告熙熾熙誣服文原行部按問

得寶杖僧而釋熙桐廬人戴汝惟家被盜有司得盜獄成  
送郡夜有焚戴氏廬者而不知汝惟所之文原曰此必有  
故乃得其妻葉氏與弟謀殺汝惟狀而于水涯樹下得屍  
與漬血斧俱在焉人以爲神六年移江東道徽寧國廣德  
三郡歲入茶課鈔三千錠後增至十八萬錠竭山谷所產  
不能充其半餘皆取之民間時轉運司官聽用鄉里譁狡  
動以犯法誣民而轉運司得專制有司凡五品以下皆杖  
決州縣莫敢執何文原請罷其專司俾郡縣領之徽民謝  
蘭家僮汪姓者死蘭姪回賂汪族人誣蘭殺之蘭誣服文  
原錄之得其情釋蘭而坐回時久旱不再獄決乃雨至治

二年召爲集賢直學士泰定元年兼經筵官以疾乞歸卒

年七十一贈江浙行省叅政事諡文肅

元史本傳

夏若水錢塘人至元二十九年授温州路總管初至郡歲歉廣招米艘民賴以濟雪冤獄創永嘉書院朝命造征瓜哇船若水慮吏胥病民令民備材躬董其役民咸德之

錢塘

縣志

凌德字信翁杭州人至元間以懷遠大將軍爲處州路總管連年值旱德乃露頂跣足行烈日中祈雨每禱隨應有以詩頌之者曰雨向心中得雲從脚下生郡人愛戴如父

母萬歷舊志

楊瑀字元誠杭州人天歷間擢中瑞司典簿帝愛其廉慎  
有深沉之思嘗謂廷臣佛嘉堪曰楊瑀有謀事必咨之超  
授奉議大夫太史院判官至正乙未江東浙西盜羣嘯乃  
改建德路總管建德在萬山中屬邑淳安又連歙境賊由  
歙窺界而邏者疑長樂鄉民爲盜執以歸諸獄連數百家  
民益洶洶主帥者謀往捕瑀不可曰倘因疑枉鼓衆亂賊  
得乘機突來悔焉及我請撫之果不測當任其咎遂肩輿  
從數隸直抵淳安邑人嘗厄官軍抄掠散匿山谷間瑀載  
米二百石聲言賑濟使縣令馳諭民皆歡呼持牛酒來拜  
瑀喜曰吾固知民不吾負卽日還瑀莅郡視之如家民亦



視之如父母其像而祠者凡十有四所行省最其功進階

中奉大夫

楊維楨  
撰墓碑

林堅字仲寶錢塘人大德初授常湖茶園副提舉茶戶歲  
貢有常有司又復役之皆以爲苦堅聞于朝卽蠲其役陞  
承直郎中政院斷事官折獄惟務寬平或有鞫問第以情  
求之不事撈掠進階承德郎致仕堅爲人慈祥愷悌嘗奉  
旨監製御茶于閩前爲使者指以尚食需索多端民不勝  
擾堅以廉自律復爲戢其撓政者民甚安之頌其美于石

蘇天爵  
撰墓碑

于嗣宗字德元錢塘人至正初官上虞尹以慈惠稱嘗勸

民出粟爲石堤捍海遺利甚長

萬歷紹興府志

吳欽仁和人元時舉進士爲刑部郎中訊鞫詳慎有迎駕  
顧寬者連引千數輩欽悉縱之嘗奉敕賑飢慶陽全活甚  
衆後任湖廣副使督屯奪其侵于豪右者五年增賦十萬  
尋以病辭職貧不能歸遂家焉

湖廣通志

按省志選舉及仁和縣志選舉皆無其所云刑部郎  
中及副使等銜亦非元時之官制姑從楚志錄入以俟  
參考

吳福孫字子善杭州人未冠用察舉補嘉興路儒學錄歷  
遷將仕佐郎松江府上海縣主簿到官之始歲值大早有

禱立應理民田爲豪強所據久而不歸者諭止婚姻之訟  
積數歲不決者俄奉省檄詣溫台兩郡臨給鹽場工本又  
執事鄉閭甫畢復馳傳督閩中稅賦以疾還上海卒于廨

舍

正德松  
江府志

杭州府志卷八十七

人物四 循吏二

明一

王思祖仁和人洪武初爲安州同知尋進知州在州十年  
餘爲政廉平公慎簡易近民時甫離兵燹萬事草創凡學  
校社稷壇壝多所創建思祖撫循綏靖民不告勞嘗手植  
栢數千章至今民蔭其樹而思之不啻甘棠也卒於官子  
孫貧不能歸因家於安遂爲安州人

兩浙名  
賢錄

許懋字國器海寧人元季歲歉發家儲賑貸復以萬戶長  
督海運抵大都授杭州路治中不就時紅巾賊起懋倡子

弟義勇戰却之復授以前職終不受太祖下詔求賢慤被

薦以賢良起家丙午授承事郎同知海州累著循績

萬歷舊志

張齊錢塘人洪武初任歙縣知縣時值兵燹後官民廬舍

舉皆煨燼齊諭民復業課農桑興學校又建紫陽書院政

治蔚然

南畿志

陳德輔錢塘人洪武初知海州披草萊以立州治勞來安

輯民久而思之

隆慶海州志

武亮錢塘人洪武三年知徐聞縣時法制草創亮招撫流

離立學校築陂塘悉心經理百務咸舉民賴之

廣東通志

鍾友諒錢塘人洪武初知忻州興利除害有循良聲凡城

郭公署祠宇壇壝皆所建立公私不擾而功畢集及去民

皆泣送不忍捨後擢金華知府

山西通志

周斌錢塘人洪武初知登州九年陞州爲府遂遷知府登地並海民瘠斌撫綏有方民日熙阜勸學崇教使海陬僻壤興於禮樂使民咸化服之

浙江通志

陳潛夫字振祖錢塘人徙居崑山性端方善訓迪洪武六年聘授縣學訓導登其門者多成偉器後擢國子監學正上獎直臣簡師儒勵廉恥審用人四事上嘉納之

蘇州府志

按忠臣卷中有陳潛夫字元倩崇正時人與此異

趙文字夢得錢塘人洪武七年知藤州廉以自持誠以待

物政尙仁恕秩滿去民言及輒流涕焉

廣西通志

金師古字元哲號述菴錢塘人洪武辛亥進士知分水縣政尙嚴明奸豪屏跡視民若子介然自守吏不敢欺修築墮遺教民播種甚有遺惠後擢永州府同知去民思之祀

名宦祠

分水縣志

徐遷錢塘人洪武辛未進士授零都知縣政事修明黎庶安阜時治尙威嚴民間以學爲諱遜日與諸生講究經史勞來不倦士皆向風後擢徽州知府老稚涕泣以送

頤州府志

陳觀字觀瀾富陽人洪武庚午舉人除福建延平府學教授講究經史條分縷析士心悅服歲滿調湖廣黃州教授

法如延平居七年丁內艱服除陞國子助教以口疾請外  
改補武昌教授躬行敷教上下信之秋滿諸生乞留事聞  
調荊州教授師道益振滿考諸生復請留觀引年致仕

富陽

縣志

于敬錢塘人洪武庚午鄉薦歷御史春坊至江西方伯才

能著稱士林重之

萬歷錢塘縣志

蔣宥字文惠仁和人洪武丙子舉人知江陰縣慷慨有志

畧不事苛察大得民心擢建寧通判

常州府志

梁大舉字仲仁錢塘人洪武間以人材徵授陝州判官有

異政清白聞遠通以母老辭歸年七十三卒

萬歷舊志



按成化舊志字與名互異

張昇字仲高錢塘人弱冠有才識推擇爲郡吏卽以清謹稱守以下咸禮遇之勤視簿書取嚴一介諸爲奸利者皆敬憚洪武間謁選超授吏部員外郎矢志堅貞終始無玷及卒上察其廉特給驛舟遣內臣送柩還鄉

李時勉撰墓誌

凌雲仁和人洪武中爲南陽府推官積年滯獄一時剖決

始盡時論歸之祀名宦祠

河南通志

童謨錢塘人洪武中知番禺縣邑在省會稱繁劇謨以廉潔自持政平賦均民安訟息政績爲諸邑最以愛去後擢

江西按察使

廣東通志

林鍾字仲鏞杭州人洪武中授崑山學接引後進惟恐不  
及士翕然宗之每相語曰見林先生覺意表言外別有箴  
規成化舊志

姚震字起東仁和人洪武二十九年鄉試第一授建寧縣  
丞明敏廉介吏民信服考滿擢安慶府推官罷去尋以館  
閣薦起爲監察御史歷福建按察副使建寧府志

邵貞字維翰餘杭人洪武中以貢生任安仁知縣報最擢  
御史有直聲改部郎陞廣東僉事敷歷中外律已嚴治事  
敏勞而不伐察而不苛雜亂紛糾無不經理以故吏畏民

懷云饒州府志

傅道字士行錢塘人洪武中任德化縣丞清介自持携二童隨任時陳友諒初平民散野荒道力爲輯和遂獲成效卒於官貧不能歸葬城東欽天山麓

德化縣志

洪葆字子厚杭州人洪武三十年通判泉州居官廉謹性尤謙退善歸長官過則自引遇名儒賢士必折節講論終日忘倦扶弱恤下如恐不及疾卒於官父老爲祠祀之

萬歷

泉州府志

林暄仁和人歲貢生洪武三十一年任常熟縣丞守身謙

潔保善抑豪永樂五年以求賢陞袁州府通判

姑蘇志

郎子貞杭州人吏員洪武三十二年任建寧府推官慎默

端嚴視事無寒暑早暮推謙詳審決斷公明擢大理寺評

事

建寧府志

湯宗字正傳富陽人洪武間由太學生擢河南按察僉事陞山東按察使左遷刑部郎中永樂中擢蘇州知府時郡遭水患黎庶流離逋稅百餘萬石宗不忍迫從容勸富民代輸富民感其仁愛皆從其令尋陞大理寺卿河南民被水災命宗往賑之流移來歸未幾坐累繫獄者十餘年洪熙初復大理寺丞遷南京大理卿宣德初命清理戎籍於山東時天久旱宗上疏極陳民間饑饉疲困之狀請免租稅蠲徭役罷不急之務上皆從之尋召還卒

富陽縣志

李貞海寧人洪武間補弟子員建文元年赴京上用兵方  
畧上嘉其忠義命光祿宴之授官歸隱靖難師起被謫爲  
民宣宗朝召爲揚州知府三載章累百上民被其澤考績  
入覲以疾乞歸謝還初所賜勅諭上曰知府無與勅者與  
爾以旌賢也其傳示子孫以見朕優禮之意遂歸家徒四  
壁持正不苟以終其身

萬歷舊志

王綸字仲經餘杭人洪武間歲貢入監除廣安州判官永  
樂八年考滿陞平陽推官廉能有政績十五年陞石肝知

府

餘杭縣志

楊昇錢塘人洪武丙子舉人永樂初爲邵武府學教授善

於誘掖作人爲多弟子立祠於學宮左祀之

宏治邵武府志

陳敏仁和人建文末爲吳江縣主簿明果而恕永樂六年

陞刑科給事中

成化舊志

趙承宣字元臣臨安人至正末兵興上弭盜安民十策辟

爲昌化縣教諭嚴學規勤教育里中饑出所藏粟賑濟鄉

人德之永樂元年舉茂才授崇德州同知有政聲

舊志

姚肇富陽人永樂元年舉孝廉試太常寺正改職方主事

以勤慎稱陞雲南右參議擢右參政論楮幣塞鹽井皆切

時弊陞福建右布政卒年八十四

萬歷舊志

夏子謙海寧人永樂元年舉吏才任大理評事改推德安

察情求法郡無留獄非義之餽一介不染人咸稱之

湖廣通志

陳任字孝原錢塘人永樂初以徐州訓導召入文淵閣預修永樂大典書成陞古田教諭秩滿諸生疏留在任十餘

年勤於訓迪得人爲盛卒於官

古田縣志

湛禮字用和錢塘人永樂甲申進士授內江知縣陞大理評事再遷知韶州府韶歲貢藤而產於渤海禮疏於朝得免貢又曲江豪民二十餘戶皆投充軍戶以免糧差禮乃列其狀以聞事得勘正嘗遣隸卒往樂昌督稅法外需求無已令械繫以來禮下教曰暴橫殃民法所必禁令能不以府役故屈法貸之其賢可知由是府役至邑皆歛戢不

敢肆甲乙訟田禮斷歸乙甲復誣訴藩司知其僞命禮按致其罪禮慰遣令去約五日乃來辨析竟亦不加罪也其寬厚如此清白自持始終無替

萬歷舊志

周文字宗武仁和人永樂二年進士選庶吉士改擢湖廣參議聽訟明決人稱無冤分守武昌道黃州荒旱餓殍載道文多方籌畫一方賴以全活無何卒於任民哭弔爲服

以送歸櫬

嘉靖仁和县志

何瀨字彥容仁和人永樂甲申進士官刑部郎持法嚴不撓貴勢京師爲之語曰毋縱誕避何鐵面受知成祖每大獄親呼瀨名使決之出知辰州裁抑豪強凡鎮守總戎殘



擾市肆者悉舉正其罪民立生祠以祀

萬歷舊志

高暉字汝晦臨安人廉潔好義爲諸生道逢遺金拾置墻隙中俟其人還之永樂甲申成進士官四川僉事民有烏桓霑益部者訟田繫獄更數吏不能決暉至廉得其實立爲斷之後謝政去其人以黃金廐馬爲贈暉悉拒却邊民感之爲構却金亭以彰其德

臨安縣志

俞益字友謙臨安人永樂甲申進士選庶吉士預修永樂大典授靖安知縣有惠政改潛山大興學校造士多爲閭人秩滿當去邑民千數詣闕乞留再任卒於官室如懸磬至無以爲殮吏民哀慕而助給之始克襄事歸

兩浙名賢錄

彭清錢塘人永樂丙戌進士知容縣事先是前官余友諒招撫流民師征交趾又黃昇始建城隍立學校清繼其後竭力經營規制以備撰次邑志後擢烏蒙通判

廣西通志

孫景名字克正富陽人永樂戊戌進士擢福建道監察御史改揚州府推官調臨江折獄詳慎治無冤民有瑞蓮生聽事治中陞知涿州惠政及民蝗不入境調潁州興學校恤流逋麥秀至三五岐民歌誦之

富陽縣志

陳浩錢塘人永樂辛丑進士知零陵縣文學政事爲一時

所稱擢御史去

永州府志

洪鈞字惟衡新城人永樂丁酉舉人知新喻縣歲饑鈞賑

齊有方以賢能調屯留陞銅仁知府再遷長沙所至有惠政留心法律推獄詳審以故新喻嘉蓮並帝生縣塘屯留芝草產堂柱長沙有甘露凝於郡齋林木士人賦詩以紀

其瑞

萬歷舊志

謝衡字仲平仁和人永樂甲辰進士授監察御史舉刺不避臺閣生風時鹽法沮壞轉運非人上意欲得廷臣賢者爲之參佐廷議用衡與耿九疇爲淮北淮南運司同知九疇不數歲遂至刑部尙書爲世名卿而衡以親喪歸卒不究其用士論惜之

仁和縣志

嚴恭字德容仁和人永樂甲辰進士授監察御史恪遵憲

度務持大體其所巡歷貪汙歛手良善獲安陞貴州參政

卒

仁和縣志

陳純字希文寧夏籍錢塘人永樂甲午舉人任奉新知縣

有惠政吏部以聞賜鈔幣樽酒仍推恩贈其父母

萬歷南昌府志

吳迪錢塘人永樂癸卯舉人知淑浦縣政教兼舉威惠並

行修築陂塘堰溉田至今民被其澤後以疾卒於官民皆

涕泣祀名宦祠

淑浦縣志

周安字元靜仁和人永樂中以國子生授刑部主事陞郎

中精聽讞慎刑法既履官卽遷處於外使志慮清曠務得

獄情以是人樂輸誠徃無冤繫擢江西按察司副使矢志

清白歷官二十餘年家無尺寸之儲

浙江通志

許性字秉彝海寧人永樂中以薦舉授贛州同知陞刑部郎中持法嚴峻人莫敢干以私有指揮失機性勘問依律指揮陰憾性遂誣致其罪謫戍蓋州衛一時服其秉正而

冤之

海寧縣志

邵棠新城人永樂間知巴陵縣尙廉潔勤政事均賦役民深德之秩滿請於朝復任焉

岳州府志

傅礪錢塘人永樂中任邵武縣丞清謹精勤有政績後擢

建寧縣亦以廉能著稱

宏治邵武府志

傅潤字克溫仁和人永樂丁酉舉人授滄州同知廉明服

人能白誣獄有傳城隍之稱以薦擢保安知州正統初中  
貴王振用事振姪顯順怙勢侵奪民產莫敢誰何潤廉得  
其實竟置之法及入計復不爲餽遺振銜之以廉無可指  
再逾期振嗾總兵者委潤備糧瘁疾而卒

舊志

王琦字文璫永樂甲午舉於鄉授汝州學正潔身先士卓  
有師模正統中擢河南道監察御史廉明勤慎斷獄不爲  
刻削虛心聽理務盡其情平反當死囚幾七十人遷山西  
提學僉事精考校敦行實士習蒸蒸改觀未幾以憂去服  
闋改四川兵備道川故多盜琦威行令明盜聞風遁去尋  
致仕歸歷官三十年家貧甚衣食常不給郡守胡濬欲餉

之懼其不受列狀於朝詔賜百金琦固辭竟寒饑以死含

殮不具一時藩臬長倡義卹之始克歛

仁和縣志

余敏字克勤昌化人永樂辛卯舉於鄉授廣州推官丁外艱服除改湖州在任三載德威咸著復以內憂去起補松江時國憲嚴密覲官稍有不職卽不敢往敏之任五載凡兩覲奏績咸最宣德間擢山東道御史秉正不阿未幾因疾乞休家居二十餘年以好義爲邑人倡請令設倉廩首捐穀百石儲以備荒衆相繼樂輸災旱恃以無恐又竭橐

新儒廟士林頌焉

昌化縣志

周健錢塘人永樂辛卯進士初以御史言事出知交趾下

洪宣德八年改知全州勤慎有爲任滿民千餘詣闕請留  
乃進奉直大夫還治少師楊士奇贈詩有歸到清湘三月  
暮郭南騎馬勸春耕之句時與柳章並稱民久而懷之

廣西

通知全州時大著聲績進秩視事

明史循吏傳

徐瑛杭州人永樂甲午舉人正統中知晉江縣時汀寇爲  
患寧陽侯統軍駐延平檄調晉江民兵瑛恐民心騷動親  
詣軍門陳其利害及大軍抵泉從容酬應民無驚擾

萬歷泉州

府志

陳敏政字志行其先湖州長興人後居仁和遂爲仁和人  
宣德丁未進士授潛江知縣爲政廉平不尙苛刻四民樂



業再轉南康知府宅心公正輔善抑強復社倉修石隄建

白鹿書院百廢俱興郡人德之從祀周子朱子祠

萬歷中舊志

貴旁午求閩中方物敏政知閩縣以智應變奸徒爲之斂

手

福建通志

陳良器字彥成敏政子成化辛丑進士宏治中由南京大理寺正擢知池州內和外剛聽斷明決在任九載以清白

稱州人祠之仕至應天府尹

池州府志

陳冕觀之子宣德丙午舉人任山東鄒城教諭修築沙灣有功陞教授比沙灣復決冕奏欲永息此患在用人得宜司空惡其專檄山東巡撫督冕成功否則械送闕下得旨

給事陳嘉猷上言朝廷榜求治河之畧竟無一人言晁固有修河成效部曹族之必期置之有罪之地晁不足惜如國計何上據收回成命晁復底績仕終國子監丞

富陽縣志

莫源錢塘人宣德己酉舉人任松溪縣教諭經明學博工詩善書畫尋以憂去正統間知茂名縣興學造士修築隄塘人蒙其利焉擢監察御史奏罷馬房鈔京師人至今德之

建寧府志

陳信字履信仁和人宣德間以薦擢大理評事改南京西城兵馬副指揮陞蘇州府通判却例獻慎官箴清操益勵督餉之京部民獻白金爲贐信悉拒却事竣乞歸道經吳

門前餽金者復來獻信一無所受蘇人杜瓊贈詩云南還  
依舊一青瑣又却吳民餽贖錢縱使此生貧到骨只留清

白與人傳

仁和縣志

陳讓字克遜錢塘人宣德間任崇安縣丞勤於贊理賦稅  
得宜學校壇壝樵樓皆所修治

建寧府志

陳斌字質夫錢塘人宣德九年由監生知婺源縣勤信廉  
明民服其化尤篤意學政凡殿堂書閣文昌祠宇一皆新  
之秩滿擢太僕寺丞

婺源縣志

張昇錢塘人宣德間由進士出知蕪湖縣時中貴絡繹督  
辦貢賦昇才能應劇民多賴之又建水際倉便民輸納兌

運後擢兩淮運判

太平府志

按省志及錢塘縣志選舉俱無張昇之名洪武朝有張昇已錄見前傳其事迹弗類應是兩人茲據太平府志補錄

盛塤錢塘人永樂丁酉舉人正統初知光澤縣爲政得體

吏民懷之

光澤縣志

周冕字尚文臨安人宣德間貢生正統初知德慶州明而能斷修廨宇興學校六載以憂去

廣東通志

蔣忠字尙功仁和人正統丙辰進士知太平縣省賦輕徭民用不匱改知丹徒有才幹尤長於撫字時閩浙有警邑

當衝要軍需旁午忠與知府張巖協力措置民獲安堵歷萬

鎮江

府志

沈和字用禮仁和人正統乙丑進士累遷刑部郎中持法不避權貴曹吉祥怙勢其部下有姦人妻者爲夫所殺吉祥必欲致其夫死和堅執不從竟俱下詔獄門達苦燬之

終不引伏降通判以去後擢撫州知府致仕

兩湖聖談

邵麟字邦祥號顯郊富陽人正統十三年以貢生授四川忠州吏目居官廉謹任事果斷十四年鎮遠播州苗獠作亂上命御史周文偕靖遠伯王驥往勦麟奉檄從征畫策破賊險隘賊懼歸欵紀功陞本州同知尋署鄧都縣民爲

之謠曰民食缺邵公備民衣破邵公補邵公去後民無釜  
任十三年前後報最以親老請歸養子暘字體乾以序貢  
授刑部照磨與張璉友善及璉相要同議大禮暘堅執不  
從爲胡世寧所重陞鄖西知縣諭降剽盜百姓立祠祀之  
孫琢字成夫歲貢生授大浦訓導尋遷彝陵州學正定冠  
婚喪祭燕飲之儀以式侈靡士民咸薰其德云

富陽縣志

李祐仁和人正統十二年知建德縣識達治體果斷有爲

更不能欺庶民畏服

萬歷池州府志

張紳字時敬於潛人正統乙丑以明經授松溪令政尙慈  
祥尤屬意訓士戊辰處州鄧茂七倡亂民被脅從甚衆主

兵者方主勦紳憮然曰赤子湔滌無由我之責也詣軍門  
請與子俊抵山寨諭以禍福卽歸歛得復業民二千七百  
戶未幾建安蘇得又以妖書惑衆聚千餘人爲亂紳密令  
風道暹者擒其首惡餘悉解散九載卒於任子俊奉柩歸  
男女哀哭塞途築祠於邑祀之

福建通志

金檣號雙溪於潛人以恩貢判閩之漳郡漳故瀕海寇警  
不息檣至嚴斥埃戢軍政甫半載沿海肅清民有狼燧消  
紅蠻烟永息之頌撫按交章薦之陞南寧貳守乞養親致  
仕子夢龍爲浦江教諭恩養交至卒於任諸生數十人扶

柩歸

於潛縣志

朱鏞字廷用仁和人景泰辛未進士授南京兵部主事歷  
鄖中出知廬州時合肥僧殺其師舒城民婦以姦殺其夫  
六安民殺從弟皆誣坐他人鏞至閱成案逮治廉得實俱  
改坐御史驚以爲神秩滿擢廣西參政適鬱林賊起督撫  
統兵往征命鏞紀功師還感疾遂致仕歸

兩浙名賢錄

楊景仁和人景泰辛未進士有經濟才勤於政理天順間  
知淮安府募粟備荒發廩賑饑山東淮西之民流入境內  
者皆賴以全活兼爲營室子女之無歸者婚之三年上最  
于朝九年詔晉秩參政仍蒞府又三年代去去之日百姓  
挽留父老嬰孺頓首獻飲食淹三月乃得行計景守淮凡



十二年行李蕭然一時咸稱其廉

萬歷淮安府志

張珩字鳴玉仁和人少介特力行好修嘗以一介不取爲本分內事嘗溫州却金亭爲近名人多以廉士期之景泰元年領鄉薦甲戌授監察御史整點京營壯羸老弱過目輒不忘人皆憚其明察丙戌陞廣東按察司僉事尋改山東嘗錄劫盜獄發奸摘伏如神部衆驚服太監溫某感其舊德餉以金綺珩拒却之溫愧而擲于河甲午陞本省副使致仕歸橐中蕭然僅如素士卒之日幾無以爲殮

萬歷舊志

許傑字廷儀錢塘人景泰庚午舉人以御史調知華容縣雄才偉畧設施有條闢縣廨創行署輯黷官範祭器後人

守爲法度歷天順成化間罷官歸

岳州府志

江震錢塘人景泰庚午舉人天順間授上海訓導動止有常勤於職事每旦集諸生課其講讀所造就甚多兩典文柄皆得人後以薦擢知廣濟縣

正德松江府志

孫璋字景章海寧人景泰壬申以賢良方正薦授江西泰和縣丞嘗親定徭役旦夕令下請托不及行人稱爲霹靂手指其牒爲鐵板榜文言其公平允當不可更易也擢博白縣知縣韓雍征大藤峽璋從行多著勞績超授潯州知府歲饑米價翔踊出公廩粟減值以惠饑民屬邑有爲民蠹者悉置諸法邊郡大治擢山東右參政致仕

兩浙名賢錄

羅珪字廷璧新城人景泰癸酉舉人知寧都縣俗橫貸息沒貧人產珪至禁止之擢太僕寺丞政務簡易人樂其便

舊志

毛智字彥通景泰丙子領鄉薦初任山東膠州知州膠守禦官軍暴橫難治智威惠並行使不敢肆惟其尤桀悍者具實聞於朝悉置之法兵民帖然明年水災智日講求荒政釋疑獄緩徵輸設法平糶賑濟全活甚衆秩滿以最遷宗人府經歷凡膠人至京者往往詣門叩頭或至泣下宏治丙辰擢知江西南安府在任三年郡以大治乞休歸年

八十卒

仁和縣志

李昂字文舉仁和人景泰甲戌進士成化間出知青州屬  
歲大饑昂請發官廩數十萬石又勸富民出粟八萬餘石  
以濟全活甚衆近境流民至者又爲糜以給之在治八年  
墾田至五千餘頃流民自占五萬二千家活饑民二十餘  
萬將就代部民列其治行三十四事詣部使者乞留立生  
祠於表海亭事聞上賜璽書褒諭尋陞福建左參政進山  
東右布政使轉河南左轄作門禁吏範各五篇禁王府諸  
司和買民感泣陞都察院副都御史宏治間信豐安遠武  
平上杭等處劇賊楊九隆等倡亂昂奉命統兵討之先聲  
所加民夷驚服捷聞賜寶鈔金幣兩廣狼狽夷叛江右湖

湘閩浙羣盜乘間竊發事下廷議衆共推昂乃命建節率諸道兵往討併制六藩昂親統大衆深入賊巢斬獲以萬計散處諸脅從於襄漢境上得貸死者八千餘人改督漕運創開康濟等河濬安平黃河諸源未幾卒賜祭葬蔭其

二子

萬歷舊志

吳福字天爵錢塘人初起刑部掾屬以從征閩寇鄧茂七有功授兵部司務景泰二年復從都御史蔣琳撫貴州叛夷尋改工部福爲人廉直義不苟取嘗過寶應夜宿驛中獲遺金數百兩急呼驛官掌之詰朝牒付縣爲修學費尙書倪謙學士錢溥咸爲紀其事海內多誦美之仕終武昌

府知府

萬歷錢塘縣志

邵琮字叔璋仁和人登天順庚辰進士授大理評事獻鞠多所平反累擢湖廣僉事時武岡諸縣初燬于兵琮竭力撫綏築城建縣士民倚之又設奇策擒孝感巨寇李善境內帖然轉陞四川按察副使俗善告訐琮聽斷精核庭無留獄尋致仕歸

萬歷舊志

吳誠字尙忠錢塘人景泰辛未進士授兵部武庫司主事歷吏部考功郎中陞四川參政進湖廣左右布政使陞都察院副都御史巡撫湖廣明年改雲南誠才識宏遠前後所歷皆有政績賢聲其撫雲南叛夷尤盡心力未幾卒于

官

萬歷舊志

方銓字景衡新城人天順壬午舉人任安陸州學正治易以專門授諸生其有習他經者訪鄰郡明經之士爲之具幣往卒業焉一言一行必步趨先民凡教人悉以身先之多所成就從子源宏治間鄉貢授候官訓導陞建寧教諭訓士一如銓法溥以舉人歷任婺源龍溪知縣所至皆有聲一時稱善政善教者必曰方氏云

嘉靖浙江通志

錢鉞字大用仁和人成化中知汝寧府事至皆自剖決吏胥無所容其奸暇則行縣教民開陂堰勤種植歲獲其利于是逋亡歸者戶八千有奇郡內翕然稱治在任九年陞

陝西參政

河南通志

累官副都御史巡撫山東其民俗素悍詐

而士習卑靡殊甚鉞乃手輯一書遍採古今格言雜以律

令條誥名至道編刊刻頒示數年之間民志安靜而士風

亦爲之振起尋致仕歸

山東通志

石磐字鴻漸仁和人天順己卯舉人成化間任湖廣嘉魚

訓導性恬退於世無所嗜好諸生貧乏者多賙給之邑人

李田任浙江參政將之京師資以官舟不受其故人爲卿

相累召相見終不往世以此高之

湖廣通志

馬迪字惠吉仁和人天順間貢生成化中任福寧州同知

清慎敏捷修舉廢墜有便民者無不爲善詩畫所至留題



州人皆愛重之

福寧府志

潘安字惟久昌化人天順中以材幹除沛縣簿時邑有黃冠者談人禍福莫不響應道府官以下咸崇禮之安一見曰此妖也密持劍往擒遁形爲猿卽械繫之上官不能治令仍授安遂斬之人皆以爲神先是杭府述運設紅船水夫歲解閩粵方物赴京師水夫復因役橐勒派郡屬民不堪命憲宗時安兩具疏議行未能力革至宏治間年八十有五扶杖叩閭疏陳剴切詔令都御史王瑾會布按二司同安面議罷夫籍改徵役銀輸郡永免驛騷之苦兵部尙書劉大夏尤器重安薦擢通判老不就職年九十九而終

方紅船水夫之爲患也安從祖名海孫者感憤擊登聞鼓極言不便觸文皇帝怒斃杖下復甦出死于途民皆悲之

舊志

羅愈字賢進新城人天順間貢生任肇慶推官每斷疑獄能得隱情有富民殺一家三人匿情秘迹獄久不決監司下愈按治獄成具服肇人稱之

新城縣志

陸璘字廷美餘杭人天順間以監生判雷州府職掌糧儲有清勤之譽後丁母憂服闋改判福州抑巨奸剔夙蠹操守廉潔終始如一九載無公私過詔褒異之陞南安府同知致仕進階朝列大夫卒年八十二

餘杭縣志

張順字宏裕杭州右衛人景泰癸酉舉人天順間授沔陽  
州學正丁內艱服闋補平度州已而又改定州順爲人高  
邁閒曠襟抱灑落工諷詠善鼓琴三爲學博務以弦歌化  
人積官六年不遷意澹如也平生勇于爲義鄉人沈明嘗  
忤縣令陸樞樞欲陷之死適有井中屍竟坐明明被拷掠  
不得已誣服樞入覲囑丞斃之獄順聞之往告丞曰人命  
至重君當平反冤繫以補令闕顧可殺人以取媚邪丞悟  
轉聞其事于上明得不死

萬歷錢塘縣志

陸偉字仲奇號質菴錢塘人成化乙酉舉人授澤州知州  
時府餓人相食偉請發內帑沿門賑救區畫纖悉不懈晝

夜全活數萬人。人繪像生祀之。州多宗室分封和買併吞之害。其來已久。歲時祿米後輸辱及官吏偉裁之以法。豪宗大族武斷鄉曲。凌轢閭左者。皆禁不得肆。請托不行。因相銜之。思嫁禍於偉。喉宗室誣奏數事。下法司勘讞。詔使至州。民無老少填塞街巷。稱冤使者得其實。事白。時大同有獄久不決。尙書檄偉訊之。盡得其狀。尙書驚喜執其手曰。微子何以折斯獄。州有寧山衛軍民雜處。恒患不靖。偉攝之以威。彼此帖然。總鎮太監歲有祗候之索。所屬爭先取容。偉獨不與。葺州治。新儒學。廣程子祠。至於漏澤園。常平諸倉。路塗橋梁。靡不脩舉。民甚德之。致仕歸。州民攀留。

數十里不絕至泣下者後卒年八十有九

山西通志

汪箴仁和人成化壬辰進士知會同縣廉謹公平民訟自  
息尤善于課士撰解經書力興學校所成就甚衆後改知

句容縣民思之祀名宦

湖廣通志

張本字孟端錢塘人成化乙未進士授工部主事累官知  
府歷襄陽青州吉安三郡吉安多巨室暴橫鄉里本下車  
首擊武斷者數人豪強斂戢表揚忠節若楊文貞劉子輔  
譚節婦皆奏請祀之綱紀下吏法在必行貴勢無所撓屈  
陞廣東右參政尋轉湖廣右布政使晉都察院右副都御  
史巡撫江西時袁瑞間盜發本諭以利害盜稍稍解去竟

以不能勦捕爲言者所論乃致仕

舊志

吳雄字文英北京錦衣衛籍仁和人成化戊戌進士授刑部主事議者欲割潞縣地隸河南潞人不服至執兵相殺雄往視爲正其分界罪其尤健黠者數人事遂定歷官郎中擢河南按察司副使進湖廣按察使衛卒有以私憾殺其宗人而棄屍井中其妻子跡知之訴于官卒知夜令人啟寺棺出其屍易置之明日視之則非也衆莫能辯雄他日避雨寺中見一棺血漬狼籍疑之召其妻子往驗遂得實衛卒抵罪拜應天府尹初視事集僚佐堂上告曰官職守藏卽無侵盜然事固當盡始視之果亡去若干銳雄密

察左右卽得盜者狀一府驚以爲神太監守留臺者恃勢  
多所侵擾縣官不敢違雄一切裁之以法勢少阻常曰任  
怨吾不辭但不至瘠吾百姓耳歲旱總漕者亟徵兌運米

雄奏請蠲免所部皆德之

應天府志

徐禮字敬先餘杭人成化戊戌進士知繁昌縣有風度練  
達事體熟知民情下車卽條約數十事榜于縣門奸豪歛  
迹民倚以安時有太監倚恃燒造令左右用黃氍覆勅懾  
之索蘆柴銀甚急禮知其奸卽收其左右械以送獄事聞  
當道覆鞫之果僞勅也力革除之召爲南京道監察御史  
多所建白時稱有張綱埋輪之風未幾由僉廣東按察司

事冤獄平反所全活甚多廣東惟海道最爲要害諸買舶嘗佯爲入貢侵掠地方禮至明斥埃堅約束累歲不敢犯後以病乞歸

餘杭縣志

潘珩字仲玉仁和人成化庚子應天舉人任九江府同知歷袁州南康持身廉介所至民懷之嘗修茸白鹿書院計罪贖有餘因置學田有不給補以俸資素不善事上官以是淹滯久之致仕歸囊橐蕭然

江西通志

按省志選舉無其名今從仁和縣志參錄

莫立之字斯立錢塘人成化辛丑進士選授江西分宜縣寬慈有恩修學築城建倉造橋具有成緒擢南京監察御



史官至四川按察副使

萬歷袁州府志

方榮錢塘人成化甲辰進士宏治間知寧晉縣持身嚴厲紀綱條約森布張列而惻怛之意藹然如家人父子躬歷阡陌不憚勞苦無耕具者爲之助其乏缺凡增丁口一千八百有奇勸輸倉穀四萬六千餘石平反重獄五十八事

擢監察御史

隆慶趙州志

朱惠字懿卿仁和人初爲諸生時家甚貧而其父頗難事惠自甘澹泊力營甘旨以進艱辛萬狀不敢告勞成化丁未進士擢南京湖廣道御史時內豎蔣琮守備南京以威權排逐縉紳事多不法惠抗疏劾之權奸股栗宏治中擢

湖廣僉事值奸究縱橫殺害良民慙首置干法以令境內  
藩府工役繁興民不堪命卽爲檄請罷止于是湖南一境  
始獲息肩居二歲卒于官

舊仁和縣志

丁養浩字西軒仁和人成化丁未進士累官四川按察司  
副使時有墊江富民殺人給孤姪使冒罪賄成其獄養浩  
廉知其寃竟反坐轉廣東右參政時河源程鄉賊蠡起養  
浩募人守要害使不得逞遣兵以次擒剿四境底寧歷雲  
南左布政致仕卒

仁和縣志

查煥字文顯海寧人宏治庚戌進士歷南北刑部郎出封  
襄藩盡却餽金陞河南僉事風紀大振改山東值曹州賊

起鎮巡簡往治之不動聲色尋卽底定擢參議卒

海寧縣志

何洽字允仁富陽人宏治庚戌進士知石首縣築城衛民

建學教士邑自是多與鄉薦者未幾調豐城興利除弊大

有振作去後民建祠祀之累遷吉州知州將之任聞外艱

不待報而歸

歸荆州府志

鄒虞字天祥仁和人宏治庚戌進士由兵部職方主事除

知延平府郡向多巨賊每乘間竊發虞善以德義感孚咸

帖服四境悉平歲遇旱潦躬禱輒應擢粵東參政復平大

寇謝政歸入名宦鄉賢兩祠

仁和縣志

盛杲字啟東臨安人宏治壬子舉人授南昌郡學訓導遷

巴東知縣當道以才堪治劇奏調臨淮民不忍捨爲立祠  
及建繼萊坊以表之治臨淮有惠政擢知山東膠州適流  
賊擾亂人民凋瘵輯柔安集流亡復業者一千七百餘家  
尋丁內艱優游林下者三十年足跡不入城市捐資鑿渠  
灌溉西洲畝田至今民德之

嘉靖臨  
安縣志

唐珉字玉和仁和人宏治壬子舉人正德中知興國州廉  
能公勤六年遷長沙同知政教更著署篆善化興廢舉墜  
弊絕風清時流賊擾鄰境珉戒嚴有備尤多保障

善化  
縣志

仰儒字世周餘杭人宏治癸丑進士除行人司副屢奉使  
皆宣威布德毫髮無所取尋陞南京工部屯田郎時逆瑾

擅權內外官多被挾私廢黜儒獨以正自持不隨世波靡  
瑾終亦不能爲害後除楚雄知府在任三載輕徭薄賦土  
官愛戴之如父母尋以母老乞休詔加秩右參政食三品  
祿卒祀鄉賢

餘杭縣志

惠隆字從道仁和人宏治癸丑進士授刑部主事歷郎中  
出守永平綏柔保釐有循良稱尋改寧國治一如永平時  
後擢江西按察司副使爲讒者所構卽拂衣歸

仁和县志

沈綸字朝綬仁和人宏治丙辰進士累官南京禮部郎中  
正德間知廉州清介絕俗不以家自隨廉州古合浦也奄  
人守珠池往往乾沒於是豪右相緣爲奸綸裁之以法民

獲安全而權豪側目卒中傷之綸死二十餘年部民思其

德為築愛民亭廣東通志

夏有文仁和人宏治戊午舉人任高郵州訓導博學高才

在任作萬言書以獻名曰保豐管見孝宗覽之稱善者良

久因取筆抹去管見二字改曰保豐冊萬歷高郵州志

顧璣錢塘人宏治甲子舉人正待選新寧縣勤恪端介

時民敝于兵極意撫恤之及勦捕師至憲副王大用委鞠

所獻囚玉石不少混有淑問之風亡何卒百姓哀之廣東通志

毛鵬海寧人宏治間貢生任袁州通判清苦自勵一如諸

生時其端醇之品始終一節尤有先民之範祀鄉賢寧志備考

唐琳海寧人宏治間貢生任大名訓導持身端肅孝友無

間嘗道拾遺金而不私士論多之祀鄉賢

海寧縣志

趙錫字居易於潛人宏治間以貢生通判泗州尋署州篆

修學造士時歲歉民多逋賦錫鬻田以償之民咸感其德

無何以疾卒於官祀名宦

於潛縣志

王果臨安衛人宏治間知中江縣鄒智嘗稱其清慎勤賦

三事堂詩以美之正德初擢四川參政賢聲益著

四川通志

錢宏字可容錢塘人正德戊辰進士授刑部主事晉員外

諫獄西曹以明慎稱陟山東僉事巨寇王堂趙志劫掠近

縣宏督兵一鼓擒滅之擢副使革鎮守無名夫役刑其屬

民者民賴以安宏在山東久多政績至拯章邱水災所全  
活萬人功德尤著擢廣西按察使累陞福建湖廣左右布  
政使進副都御史督兵南贛簡閱兵備節財裕民建趙清  
獻文信國二祠以訓忠節因病乞歸逾三年卒  
萬歷錢塘縣志  
方坤字萬成餘杭人正德辛未進士知任邱縣性頗剛直  
不爲權奸所容更知永寧尋陞大理評事後以病乞歸  
餘杭

縣志

祝繼龍字思允海寧人正德癸酉舉人授饒州推官調徽  
州饒富而後則禮禁其奢侈勿使僭徽尙氣喜爭則法儆其  
強勿使橫在饒嘗捕治豪右姚甲有明允之稱歷太僕寺



丞出爲知府不赴歸

寧志備考

許仁字元夫仁和人正德癸酉舉人授巢縣教諭擢河南  
郟城令雪冤獄減重徭弭盜捍患勤于撫綏以性狷執不  
能事上官調德化德化瘴鄉民獷悍難治仁一以簡重鎮  
之毀淫祠改社學建公署導墾渠勞績顯著調同安豪右  
以舊憾騰謗遂罷歸

萬歷舊志

姚鍾仁和人正德癸酉舉人知沙河縣邑甚疲敝鍾至擇  
便于民者次第施行知府李某以嚴爲治屬縣受約束惟  
謹鍾獨酌利害陳民隱多至數千言或勸之鍾曰我不言

誰敢言者卒于官士民買棺以殮

畿輔通志

劉敬宗錢塘人正德己卯舉人知浙川縣持身廉潔加意撫循教樹畜導水利省里甲之費罷額外之差浙川推縣官之賢者必首敬宗後擢南昌通判以不諧上官投劾歸衣食嘗不給處之泰然知府陳仕賢高其行買宅居之塘

縣志

沈儀字懋德仁和人正德己卯舉人授清江縣知縣安靜不擾吏民咸歡樂之督學徐階行部至清江見其衣冠樸野心頗易之居數日則察其六事修舉所守卓然乃嘆曰設吾以皮相天下士幾失賢令矣陞惠州府通判投劾歸

浙江通志

祝繼英字思堯海寧人正德己卯舉人授繁昌知縣將之官不以家累自隨惟攜二童子與處凡服食諸用取給於家不於官澡手事事日飲江水而已遇吏以禮治民以情不喜爲小威吏民以不煩秩滿調粵東石城縣輒棄官歸

寧志

備考

張應祐字元助仁和人正德己卯舉人授蘇州府通判蘇江南大郡錢穀甲天下府倅領勸農者里甲有例獻應祐悉拒却之以子洽登第任三月卽解組歸當路餽之賕辭不受吳人高其廉應祐幼有至性事二親孝伯兄官西曹卽爲張氏衣冠之祖應祐父事之旦夕以德義相砥礪畜

諸弟和而能教友愛備至子洽舉進士官南曹武選郎從子瀚至尙書濂至都御史洵溥至郡邑牧長衣冠鼎盛爲

郡城甲云

仁和縣志

徐顯字子淳仁和人正德辛巳進士授南京刑部主事明  
察有執守嫻于律令累遷禮部儀制郎中時世宗方嚮意  
稽古禮文之事札下春官無虛日顯咸爲草創其儀屬天  
下歲貢生候部至二百人顯爲建白聽其附試京府禮部  
歲貢生預鄉試始此

仁和縣志

出知臨江府庶政修舉發奸摘

伏如神吏民莫敢欺貴人請託輒拒之曰寧負權臣不負

吾民有勢家抵禁必置之法

臨江府志

沈正字天祐仁和人正德間貢生授香河訓導會流寇起  
正上疏請城香河奏下巡撫卽以委正正旦暮躬蒞版築

乃成寇至民賴以安

兩湖  
塵談

方敏於潛人正德六年由貢生授太平知縣尋改樂安蒞  
政八載惠政如一日後入覲以年邁乞休邑民數百人詣

都保留之

於潛  
縣志

沈南金字子輕錢塘人嘉靖癸未進士授南京大理評事  
晉寺副寺正擢知廣東廉州府處官以誠卽竊盜猶覈情  
時有縱舍調江西贛州贛爲江右巨鎮宿重兵民疲供饌  
南金身先節儉以佐民急杜請托忤時貴竟坐是遠徙雲

南鶴慶府移疾歸

萬歷錢塘縣志

潘邦相號晚舟於潛人嘉靖壬午舉人授政和知縣明斷有爲會浦城壽寧盜發延及政和民患之邦相承檄撫綏盜以安輯隣邑有疑獄每愬上乞理於邦相立爲決之無不服秩滿陞武昌同知慈敏之聲一如在政和時攝黃州

知府因誅豪惡拂當事意掛冠歸

於潛縣志

胡伯鰲臨安人嘉靖癸未進士歷官至衛輝知府立意拊循延問疾苦其所興革悉適於宜以和平慈愛爲羣吏倡部民咸戴之後告歸卒于家

臨安縣志

祝繼倫字師聖海寧人嘉靖壬午舉人知江西弋陽縣當

廣南江浙要會使檄交馳痛自潔省以供庖廩故所取民  
常例悉蠲之暇卽簡俊秀論以孝悌身心實學修鄉哲謝  
疊山祠購得邑人黃潭石板文刊梓永其傳庚子大祲邑  
東寨弗靖郡守以下惶惶無策繼倫積粟治兵單車叩壘  
不越月而賊皆解散時方以吏事相繩切嘆曰吾枉已徇  
時望度外寬繩墨俾少惠吾民耳乃勢不得徒脂民無益

遂棄官歸

海寧  
州志

祝繼臯字思謨海寧人嘉靖癸未進士授南豐知縣居官  
廉節行火筴法派征簡便永爲江右令則南豐民世祠之

歷官駕部員外

海寧  
舊志

許應元字子春錢塘人嘉靖壬辰進士當選庶吉士執政者欲一見應元不往曰吾始仕也而偃僂鼎貴之門冒謁干進哉坐是不得館職出知泰安州有豪右觸死法賂權貴人以請應元不爲撓竟斃之廉白自持苞苴斷絕擢工部員外郎遷夔州府夔當楚蜀孔道號難治應元馴以廉靖時斥其桀黠者法之郡以蘇息治爲一道最擢四川按察副使調廣西已又攝兵府江巨獍莫氏兄弟三人以雄勇名兩粵間往歲常嘯聚破城殺吏討之漏刃去前兵備以擒獲報及是復出益猖獗應元設方畧購土人浹旬而三兇授首江道底寧轉雲南布政改廣西

萬歷舊志



何繼高字思守仁和人嘉靖壬辰進士知懷寧縣邑爲大  
江午道自江西宸濠叛後民多凋瘵繼高力圖拊循一日  
默坐堂上恍惚若有訴者尋得無主屍于江浒廉殺人者  
坐之嘗詰遊僧奸盜狀併計擒其黨一時赫然後爲豪猾  
所構罷歸

懷寧縣志

傅珮字朝鳴仁和人嘉靖乙未進士知興化縣邑賦重役  
繁加之軍竈錯處隣疆侵奪民大困珮力請之巡按御史  
洪垣均田平賦民困少甦又白臺司減站役三十名民兵  
五十名歲省巨費以千計

興化縣志

擢兵科給事中世宗幸承

天珮以才望扈從武定侯郭勛怙寵驕恣不法珮抗疏劾

之忤旨奪職郊廟禮成還章服穆宗改元起用先朝言事

直臣珮應首薦晉秩太常寺少卿致仕

兩浙名賢錄

許貫之字道卿錢塘人嘉靖乙未進士知吉水縣時按浙使者吉水人也意有所屬卽欲酬以浙事貫之曰如此則類貿易有市心矣拒不可愛養部民若子權貴干請一切謝絕由是吉水治行爲江右冠士大夫多憚其峭直徵入爲兵科給事中將去官卽出已資葺廨宇繕器具以待後尹曰吾不忍重勞民也在諫垣七日而歿行篋惟故衣同年親故代爲之殮死後妻子貧乏幾不能自存

萬歷舊志

姚良弼字夢賢錢塘人嘉靖乙未進士授南京刑部主事

出知惠州先是嶺海間多盜良弼請募民兵團保伍每隘列柵建樓懸鼓其上令曰遇盜發某處輒登樓擊鼓餘隘聞各鳴鼓應之然後陳兵守隘盜至卽擒者賞縱者與盜同罪於是盜悉解散民得安枕旋擢雲南按察副使歸

兩浙

名賢錄

徐禾字仲年海寧人嘉靖丁酉舉人知茶陵州時有巨寇嘯聚攻剽禾設方畧逮捕論死戊午秋校楚士拔艾穆後以直諫顯稍遷南京比部郎罷歸

舊海寧縣志

沈詔號龍洲仁和人嘉靖丁酉舉人知湖口縣銳意任事百廢俱興邑故無城詔目擊丁巳調兵之擾條陳八議當

事咸是之逾年而城成他如葺小學復射圃纂邑志修補

文廟祭器製樂舞建祠立祀政績偉然

江西  
道志

徐沛字南川餘杭人嘉靖丁酉舉人授寧國教授擢知河南永城縣政久廢弛沛爲之振作里中豪民詭產灑糧通邑沛廉得其詳置之法內璫曹使至省所過州縣騷動沛獨抗不爲禮邑獲以安甫一載以抗直忤時竟左遷去邑民泣送載道勒石治像以祀尋轉國子監博士丁內艱致

仕

餘杭  
縣志

翁相字輔卿錢塘人舉進士授虞衡司主事改刑部郎中出守廣平郡故多盜白晝刦獄殺畧吏民相擒一二盜魁

餘悉下敕原之盜遂平時歲祲河北諸郡饑甚相不及檄  
聞輒開倉放賑全活者數萬人治行冠河北以病免歸

浙江

通志

高應冕字文中仁和人嘉靖甲午舉人知潮廣綏寧縣務  
寬恤懲豪右設預備倉建虎谿書院麻陽兵變應冕謁監  
司請單騎往諭皆叩首棄兵改刺光州延見父老察民疾  
苦除鋪戶雜派捐權稅之無藝者盜魁鄭某大族也計擒  
而錮諸獄其黨烏獸散始視事時老橡吏抱疑牘嘗之立  
爲剖決於是訟堂聞然以養母乞歸

家傳

徐輅字鳳橋其先本莆田林氏成化間名尙顯者避地杭

州贅海寧徐氏遂蒙其姓三傳至輅嘉靖庚子舉人知永安縣爲政持大體日引父老子弟問諸疾苦務盡其情以故措施悉中間閭隱痛報最去士民號泣遮留久而稱之

海寧  
縣志

